

Pol-ate kaapiya nyendoos la vu hil bel- ate vu Tesalonika

1 ¹“Sa Pol-ande Silvenes ayuuh Timoti, waay kaavu kaapiyaa-jo laas
vu ham bel-ato vu Tesalonika

sen ham atu Aamangg Anutu yuuh Omaaho Bop Yesu Kalisi-te hil lung
laa-to. Om waay aawiingin nambe Anutu yuuh Noow lambiing samu
samu naas vu ham, osin yuuh lambiing-ambe ham alompayo nanjip
melaas.

Hil Tesalonika lawii-having niwêêk-ambe dando nivasa

²^bWaay naapêêlis vu Anutu in ham pin, tonde waay akangg navu ham
hôôk lohakin nalak busin pin.

³“Hey akangg navu ham-ambe hey naalohak vu yate Aamangg Anutu
in nambe ham awii-having Yesu be ham nawiing kul anivasa, tombe ham
ahem naving Omaaho Bop ondeey ham nawiing kul bopaata, tonde ham
akam navu yate Omaaho Bop Yesu Kalisi lôôt in nambe navu nom vu
yiy-ato.

⁴Halingg-aso, Anutu ahe having ham om hey alak ni nambe yoo holin
ham ak. ⁵^dIn banye nivasa sen hey hako laas vu ham-ato, ond hey-ame
aanêêl vakasin malis amu le, nganjo Vavi Vaambuung vu niwêêk vu hey-
ambe ham alak ni vanuh nambe hey aanêêl vakasin keen. Tonde va pin
sen hey nando having ham-ambe hey naawiing-ato, ond yik hey naawiing
in nambe dôôvu ham, tombe ham ahe be ham alak ni. ⁶“Tombe ham
taamuyin va sen hey naawiing-ato osin ham navu taamuyin Omaaho Bop
having, de sen ham hako banye nivasa lak-ato ond ham hako nimeen
ngeeyaata, lemu Vavi Vaambuung wiing-ambe ham ahem anivasa having.
⁷“Tombe ham kaandu hil pin sen lawii-having Yesu vu Makedonia yuuh

^a 1:1 Sin 17:1-10; 2Tes 1:1 ^b 1:2 Pil 1:3-4; Kol 1:3; 2Tes 1:11 ^c 1:3 1Ko 13:13; Kol 1:4-6

^d 1:5 1Ko 2:4-5; 4:20 ^e 1:6 1Ko 4:16; 2Tes 3:9; Sin 17:5-9 ^f 1:7 1Pi 5:3

Akaiaa-to, tombe mem layi be davu sapa hôôk ham. ⁸In ham anêêl Omaaho Bop-ate vakasin la lohvu taaku pin. Ham-ame yoo anêêl vu Makedonia yuuh Akaia mu le, nganjo hil vu taaku pin lango banye lung la nambe ham awii-having Anutu, om hey-ame aalohvu nambe naanêêl ham taato vu omaaho ti le, in lalak ni lung la. ⁹In hil vu taaku pin datulin vakasin lak hey nambe hey alaas vu ham atombe ham havuuh anutu tatuhin vaha-so la, de ham ahilin ham vasa vu Anutu, tombe ham atu Anutu keen sen nando metumin-ato yite hil kul vaha. ¹⁰Tonde datulin having nambe ham monanggin Anutu Noow in nambe le nom vu baandoni, yik Yesu sen Anutu wiing-ambe kandi lak vu hil yimbina-têêto, tonde lôôh yiyi vêêl in nipaya nyevahaan sen Anutu le bu vu omaahonôôn vu taamusin-ato.

Kul sen Pol nawiing vu Tesalonikaa-to

2 ¹Halingg-aso, ham oo alak ni nambe hey alaas vu ham atombe heyate kul-ame la malis amu le. ²Tonde ham alak ni nambe hey ala Pilipai munggin atombe hil lavu nivaane vu hey-ande lanêêl hey pale. Tonde hey alaas vu ham atombe hamate hil ngeeyaata layiis ngaamong vu hey having, le ma de yate Anutu vu niwêêk vu hey, om hey aanêêl Anutu-te banye nivasaa langaah vu ham-ande hey-ame aayêênin e. ³De hey aanêêl vakasin vu ham in nambe ham ambiing gaving banye nivasaa-ju, ond hey-ame aanêêl vakasin ti la paya le, de hey alonggpayo me-ningook e, tonde hey-ame aawiingin nambe tatuhin ham e, malis. ⁴Nganjo Anutu sahi hey-ambe yi nambe hey aalohvu, tombe vu banye nivasaa vu hey, om hey-ame naanêêl langaah in nambe omaahonôôn lanji hey nivasaa le, nganjo hey naanêêl in nambe Anutu sen yoo nalak hey alonggpayo nii-to ji hey nivasaa. ⁵Ham alak ni lung la nambe hey oo nando having ham bôôy-ato, ond hey-ame aanêêl vakasin osin nanyêên hôôk ham alompayo in nambe ham ahem anivasaa vu hey e, de Anutu nayi

having nambe hey-ame naavun mengg nôôn hôôk vakasin anivasaa-jo le, malis lôôt. ⁶De hey-ame aawiingin nambe ham me hil vaalu gako hey haalengg jak e. ⁷De Kalisi-te sinaale-so hey, om lohvu hey naanêêl-ambe ham gako hey haalengg jak, le ma de hey aawiing va melaas amu vu ham lohvu vêêh ti sen nanggin yite noondin anivasaa-to. ⁸Hey akangg wiingin ham ondeey hey aanêêl Anutu-te banye nivasaa vu ham. Le me-manyinjo mu le, nganjo hey akangg vu nambe hey aanggimb in hey aandôôvu ham ond lung, in hey ahengg having ham lôôt.

⁸ 1:8 Lom 1:8 ^h 1:9 Sin 14:15 ⁱ 1:10 Tit 2:13; Sin 17:31; 1Tes 5:9 ^j 2:1 1Tes 1:5,9

^k 2:2 Sin 16:19-24; 17:1-9 ^l 2:4 1Ti 1:11; Gal 1:10; Jer 11:20 ^m 2:5 Sin 20:33; 2Pi 2:3; Lom 1:9; 1Tes 2:10 ⁿ 2:6 Jon 5:41,44

⁹Om halingg-aso, ham oo alak ni lung la nambe bôôy sen hey alaas naanêêl Anutu-te banye nivasa vu ham-ato, ond hey aawiing kul bopaata lôôt in vanôôn ayuuh ame busin-ande langaah, de hey-ame navu sawaah daka le, in nambe hey-ame aambu kul bop vu ham in ham ganggin hey in vanôôn ayuuh ame le. ¹⁰Tombe ham ahe be ham alak ni, de Anutu lak ni having nambe hey aawiing va nivasa vasa osin va nivalok vu ham sen ham awii-having-ato, de hey-ame aawiing vati paya le. ¹¹^PTonde ham alak ni nambe hey nanggin ham pin lohvu omaaho ti nanggin noonidin-ato, ¹²^Qom hey aanêêl tanasin vu ham in nambe ham sapa dôôk mopaatôôv anivalok. Tonde hey kaandu ham-ambe hey aanêêl niwêêk vu ham nambe ham ambiing va pin nohvu Anutu ka, in yoo holin ham in nambe ham andukanaam gaving yite hil-ambe ganggin ham, be mem ham naatu yite hil anikaapul-is-ate.

Lawii-having keen om daale niwêêk-ambe daaku nimeen

¹³^Yik hey naapêêlis nala vu Anutu nalak busin pin in vati having nambe hey aanêêl vakasin-anjo vu ham atombe ham hango nambe Anutu-te vakasin, tombe ham hako lak-ambe ham anêêl nambe vakasin-anjo me-omaahonôôn-ate vakasin e, nganjo Anutu-te vakasin, ond manyinja ham anêêl lohvu. Tombe Anutu-te vakasin-anjo nawiing kul hôôk ham sen ham awii-having-ato ham alompayo.

¹⁴^SHalingg-aso, ham alohvu Anutu-te hil bel-ate sen lawii-having Yesu Kalisi vu Yudiaa-to, in hamate hil oo lavu nimeen vu ham, yik nambe sen sil oote hil Yudia lawiing vu sil-ato. ¹⁵^Tonde yik hil Yudiaa-ju sen silate hil layiis Omaaho Bop Yesu osin hil sen danêêl Anutu-te vakasin langaah-ambe layimb-ato, ond yik hil Yudiaa-ju lawiing nindanjeen vu hey having, tonde sil oo davu sapa hôôk mopaatôôv sen Anutu nimbaya in-ato, tombe sil dayi omaahonôôn pin paya. ¹⁶^UDe sil lahelin hey in nambe hey-ame naanêêl vakasin langaah vu hil vaalu sen sil-ame Yudaa-to be Anutu dôôvu sil e, om nambêênja sil oo dawiiing va nipaya ngeeyaata lôôt savok la, om Anutu-te ahekalin e naatovu sil bulotin.

Pol wiingin lôôt nambe ji hil Tesalonika jesin naah

¹⁷^VHalingg-aso, hey havuuh ham pasivdaka, lemu hey naavingg amu, nganjo hey akangg navu ham nalohvu busin pin, tombe hey ahengg having lôôt-ambe hey oo mosalo mop lôôt in nambe hey aangge ham amem jesin naah, ¹⁸in hey oo aawiingin lôôt nambe hey anaas vu ham, le ma. De sa Pol ond soo naawiingin balon balon nambe sa naas vu ham, le

° 2:9 Sin 20:34; 1Ko 4:12 ^P 2:11 Sin 20:31 ^Q 2:12 Pil 1:27; 1Pi 5:10 ^r 2:13 1Tes 1:2;
 2Tes 2:13; Gal 1:11-12 ^s 2:14 Sin 17:5 ^t 2:15 Sin 2:23; 7:52 ^u 2:16 Mat 23:32-33
^v 2:17 1Tes 3:10

ma de Saalang-ate nimeen ngeeyaata nahilin mopaatôôv in hey. ¹⁹ *Mak hil tana sen hey natung mengg in sil, de hey akangg vasa be hey gatee hey lak in sil hôôk yate Omaaho Bop Yesu me, hôôk busin sen dukanom-ato? Yik ham-anja, ham atu heyate nôôn. ²⁰ Keen, hey naapêêlis osin hey akangg vasa lôôt in ham.

Pol wiing Timoti la in nambe kaandu sil

3 ¹ *Hey-ame aalohvu nambe anaas e, in mop ma, om nimeen vu hey, tombe sa kangg vu nambe mam lung-ambe soo mando Atens. ² *Om hey aawiing yiyate halingg Timoti sen hey ahondoos naawiing Anutu-te kul-ambe hey naanêêl Kalisi-te banye nivasa langaah-ato laas vu ham, in nambe kaandu ham in ham ambiing gaving niwêêk. ³ *In va nimeen sen natovu ham-anjaato ond me-biing-ambe ham galuuh damim vu Anutu le, in ham oo alak ni nambe Anutu yoo nêêl nimeen-anja lak yaningg nambe naatovu yiyi. ⁴ *De bôôy sen hey oo naahen nando having ham-ato, ond hey aanêêl vu ham nambe taamusin e yale naatovu nimeen, tombe yik gêên ham alak ni lung la nambe tokak ham-anja. ⁵ *Tombe sa longgpayo nimeen lôôt om same hanggin e, yik saawiing Timoti laas in nambe sa gango naambe ham awii-having niwêêk me malis, in saambe mak omaaho palapin vaha palapin ham lôôt-ambe kape ham, tombe hey aawiing heyate kul bopaata malis amu vu ham-ande nôôn ma mava?

Timoti hako banye lo-valup atombe Pol aka vasa

⁶ *Gêên Timoti vuu-ja be lo-valup atombe nêêl hamate banye nivasa vu hey nambe ham awii-having Yesu de ham ahem naving omaahonôôn. Tonde nêêl having

nambe ham akam navu hey lôôt, osin ham ahem anivasa be ham nawiingin nambe ham angge hey amengg, yik nambe sen hey naawiingin nambe hey aangge ham-ato.

⁷ *Halingg-aso, nimeen tovu hey-ambe hey alonggpayo nimeen, lemu hey hango tombe hey alak ni nambe ham oo awii-having, tombe mem wiing-ambe hey alonggpayo ahelavis lak. ⁸ *Om sen ham akam navu Omaaho Bop niwêêk nambêênja ond samu hey-ambe hey nando nivasa. ⁹ *Hey alonggpayo nivasa lôôt in ham hôôk Anutu me, om hey naapêêlis la vu Anutu lôôt. ¹⁰ *Hey oo mokataangg Anutu lôôt hôôk busin-ande langaah, in nambe biing-ambe hey aangge ham amem jesin naah. Tonde ham awii-having, le vati naahen om hey e anaas kaandu ham in nambe ham ambiing gaving osin ham alompayo doos.

* **2:19** Pil 2:15-16; 4:1; 2Tes 1:4 * **3:1** Sin 17:15 * **3:2** Sin 16:1-3 * **3:3** Ep 3:13; 2Ti 3:12

^a **3:4** Sin 14:22 ^b **3:5** Pil 2:16 ^c **3:6** Sin 18:5 ^d **3:7** 2Tes 1:4

Pol lohak nambe Anutu taato mopaatôôv in na vu sil

¹¹Yik hey aawiingin nambe yate Aamangg Anutu yuuh Noow yate Omaaho Bop Yesu le taato mopaatôôv-ambe hey anaas vu ham. ¹²Tombe Anutu biing-ambe ham ahem gaving mango-so osin ham ahem gaving hil pin naatu bopaata lôôt, naambe sen hey ahengg naving ham-ato. ¹³Tombe Anutu le kaandu ham alompayo be nivalok jak, in vakasin ti me-nanjip vu ham hôök yate Aamangg Anutu me dôök busin taamusin sen yate Omaaho Bop Yesu gaving yite hil vaambuung-aso pin-ambe lanom-ato le.

Yaambiing va nohvu Anutu ka vasa vu yiyi

4 ¹Om halingg-aso, bôôy hey taahu ham hôök mop sen ham sapa in nambe Anutu ka vasa vu ham-ato, ond ham navu taamuyin-anja, de Omaaho Bop Yesu-te hil yiyi, om gêên hey navu kataangg ham osin hey naanêêl niwêêk vu ham nambe ham oo pasam ambiing-ambe ham taamuyin niwêêk lôôt.

²De vakasin sen hey aanêêl vu ham lak Omaaho Bop Yesu haalêê-to ond ham alak ni. ³^hTonde va sen Anutu nawiingin nambe ham ambiing-ato ond yik wiingin nambe ham naatu hil anivalok, de ham anoh nanye in baayamb. ⁴ⁱTonde Anutu wiingin nambe ham gako vêêh ti ti osin ham alompayo nivalok, tombe ham oo monambiing va nohvu sen ham oo hako ham-ato, ⁵^jde ham-ame ambiing mem nôôn danje-danjeen naambe hil vaalu sen sil doosin Anutuu-to le. ⁶^kHam-ame ambiing halim-aso paya naambêênja be ham anjakin silate va le, malis lôôt, in Omaaho Bop le bu nyevahaan dukanaah va nipaya nambêênja pin, yik naambe sen hey aanêêl langaah vu ham vulôôt-ato. ⁷^lIn Anutu me-teey yiyi in nambe yaambiing va nipaya le, nganjo teey yiyi in nambe yaambiing va nivalok. ⁸^mOm omaaho sen galuuh dami vu vakasin-anja ond me-haluuh dami vu omaahonôôn e, malis, nganjo haluuh dami vu Anutu sen wiing yite Vavi Vaambuung laas vu ham-ato.

⁹ⁿTonde vakasin sen yahengg gaving yiyi halingg-aso sen lawii-having Yesuu-to, ond same le kaavu be tatekin vu ham e, in Anutu taato vu ham lung la, tombe yik ham ahem oo naving ham nandôô-ja. ¹⁰^oTonde ham ahem naving Omaaho Bop-ate hil pin lohvu taaku Makedonia doos, om halingg-aso, hey naanêêl niwêêk naah vu ham naambe ham ahem oo pasam gaving sil lôôt. ¹¹^pHam naalum mando osin melaas, tonde ham oo

° 3:11 2Tes 2:16 ^f 3:13 Pil 1:10; 2Tes 1:7,10 ^s 4:1 2Tes 3:6 ^h 4:3 1Tes 5:23; Hiblu 10:10; 1Pi 1:16 ⁱ 4:4 1Ko 6:13,15 ^j 4:5 Saam 79:6 ^k 4:6 Saam 94:1 ^l 4:7 2Tes 2:13-14; 1Pi 1:15-16 ^m 4:8 Luk 10:16; Esi 36:27; 37:14; 2Ko 1:22 ⁿ 4:9 Jon 13:34 ^o 4:10 2Tes 3:4 ^p 4:11 Ep 4:28; 2Tes 3:8,12

ganggin hamate va yuuh ame, de ham namam oo biing kul in dôôvu ham naambe sen hey aanêêl bôôy-ato. ¹²“Ham ambiing naambêênja ond ham-ame le naativak in vati le, tombe mem hil sen sil-ame latu Yesu-te hil-ato, ond le lanji be lanjak ni naambe ham nando nivasa.

Omaaho Bop e nom

¹³“Halingg-aso, hil sen latu Yesu-te hil-ambe layimb-ato, ond hey aawiiingin nambe ham anjak va sen le naatovu hil yimbin-anjuuto ni vanuh e, in nambe ham-ame naasu in sil-ambe ham paanyêêh ham lôôt naambe hil vaalu sen me-datung mend in Anutuu-to le. ¹⁴“Yiyy naawii-having nambe Yesu yimb-ambe kandi lak laah, om yik yalak ni nambe hil sen latu Yesu-te hil-ambe layimb-ato, ond sil e kandi vasa dôôk, tonde Anutu le naanggiyy sil lanom gaving Yesu.

¹⁵“Tombe hey naanêêl vakasin-anjo vu ham in Omaaho Bop oo nêêl langaah vu hey nambe, hôôk busin sen Omaaho Bop dukanom-ato yiyy vaalu sen yiyy naahen nando memoos-ato, ond yame le naamunggin hil vaalu sen layimb lung laa-to le, malis. ¹⁶“Yik Anutu le naanêêl niwêêk atombe angela-te yêêv e naateey, tombe Anutu-te vuuk naasu, le mem Omaaho Bop vu baandoni be dukanom. Tombe hil sen latu Kalisi-te hil-ambe layimb-ato ond sil e kandi jak naamunggin, ¹⁷“tonde mem le gako yiyy vaalu sen yiyy naahen nando memoos-anjôôto be yanjakana bayiimb alo baandoni gaving hil vaalu sen layimb-ambe kandi lak laah-ato, tombe mem yana balup vu Omaaho Bop vu taaku vumbalaamb, in yiyy mando gaving Omaaho Bop danggata osin danggata. ¹⁸Om vakasin-anjo ham oo monaanêêl in biing-ambe halim-aso londpayo nivasa jak.

Yiyy oo mando mengg naatum in Omaaho Bop e nom

5 ¹“Halingg-aso, ham-ame doosin in nambe hey kaavu kaapiya be hey naanêêl Omaaho Bop-ate busin osin ta vu ham e, ²“in ham oo alak ni vanuh nambe busin sen Omaaho Bop nom-ato, ond le naatovu yiyy pavis

naambe omaaho hôôndak ti valup hôôk busin lavuun. ³“Tombe hil e daanêêl naambe, “Vakasin melaas neep om yiyy nando nivasa,” tombe yik nimeen bopaata le naatovu sil pavis in nambe kawiiy sil, de sil-ame lalohvu nambe dapak in e, naambe sen vêêh noow nayêêy in navu gako tombe hango nivaane pavis.

^g 4:12 1Ko 5:12-13; Kol 4:5 ^r 4:13 Ep 2:12 ^s 4:14 Lom 14:9; 1Ko 15:3-4,12

^t 4:15 1Ko 15:51 ^u 4:16 1Tes 1:10; 2Tes 1:7; 1Ko 15:52 ^v 4:17 Jon 12:26

^w 5:1 Mat 24:36 ^x 5:2 Mat 24:42-44; 2Pi 3:10; Taato 3:3 ^y 5:3 Esi 13:10; Mat 24:39; Luk 21:34-35; Jon 16:21-22

⁴Om halingg-aso, ham-ame nando hôôk mekanu in nambe vaa-ju naatokak ham pavis naambe omaaho hôôndak-ato le, malis. ⁵^zIn ham pin atu hil amelangaah om ham nando hôôk taaku melangaah, yame hil amekanu de yiy nando hôôk taaku mekanu le, malis. ⁶Om yame naanggop naambe hil vaalu le, nganjo yiy mando mengg naatum-ande yame yalukook biing paya naambe hil sen danum bel e. ⁷Hil deep ond deep busin, de hil danum bel-ambe lundkook wiing paya ond danum hôôk taaku busin. ⁸^aNganjo yiy nando hôôk taaku melangaah, om yiy mando osin yalukook biing kul anivasa, de yaanggulis Anutu baambu osin yahengg gaving omaahonôôn, ond mem tu dayongg-ambe nahilin yiy baambungg in ngaamong. De yakangg monambu Anutu le nom in nôôh yiy vêêl-ato naatu tôômb taambusin, in nambe ngaamong naam-ato ond salosak ak tôômb-anju, be yame gangoyin naambe la hanggwang yalungg e, yik yalungg oo neep nikuusin. ⁹^bAnutu me-holin yiy in nambe yite ahekalin naatovu yiy e, nganjo holin yiy in nambe kul sen yate Omaaho Bop Yesu Kalisi wiing in nambe nôôh yiy vêêl-ato nôôn jak vu yiy. ¹⁰^cIn yimb in nambe dôôvu yiy, om naambe yiy mando memoos me yaanggimb, ond yik yiy ahondoos mando metumin gaving yi. ¹¹^dOm ham oo kaandu ham osin ham andôôvu ham in nambe ham aniwêêk jak, yik naambe sen ham nawiing-ato.

Pol samu vakasin ahus heey

¹²^eHalingg-aso, hey kataangg ham naambe ham anjêênin ham vu hil sen dawiiing kul hôôk ham lavuun, sen Omaaho Bop holin sil-ambe latu hamate yêêv-ambe dawiiing tanasin vu ham-ato. ¹³Ham angge sil anivasa lôôt osin ham ahem gaving sil in kul sen dawiiing-ato, tombe ham mando osin vakasin melaas.

¹⁴^fOm halingg-aso, hey naanêêl vu ham naambe ham ambu kôôvu nitambo-so, tonde ham kaandu hil sen londpayo nimeen-ato, de ham andôôvu hil sen sil-ame lalohvu nambe sil baale niwêêk e, tonde ham naalum in hil pin-ambe ham naanêêl vakasin melaas vu sil.

¹⁵^gHam ganggin ham in nambe ham ti-te omaaho ti biing yi paya, ond me-bu nipaya dukanaah nyevahaan e, nganjo ham aniwêêk-ambe ham ambiing va nivasa mu vu mango-so de vu omaahonôôn pin.

¹⁶^hHam alompayo nivasa jak busin pin,

¹⁷ⁱde ham oo monanohak nohvu busin pin, ¹⁸^jtonde va pin sen naatovu ham-ato ond ham oo monaapêêlis vu Anutu, in ham atu Yesu Kalisi-te hil

^z 5:5 Lom 13:12; Ep 5:9 ^a 5:8 Ep 6:14,17 ^b 5:9 1Tes 1:10; 2Tes 2:14 ^c 5:10 Lom 14:8-9; 1Tes 4:14 ^d 5:11 Jut 20 ^e 5:12 1Ko 16:18; 1Ti 5:17 ^f 5:14 2Tes 3:6,11,15

^g 5:15 Pro 20:22; Lom 12:17; 1Pi 3:9 ^h 5:16 Pil 4:4 ⁱ 5:17 Luk 18:1; Kol 4:2

^j 5:18 Ep 5:20

om Anutu yoo wiingin nambe ham ambiing naambêênjo.

¹⁹^kHam-ame anggilin Vavi Vaambuung-ate mop e.

²⁰^lHam-ame angge Anutu-te vakasin sen hil danêêl langaah-ato be ham galuuh damim vu naambe va malis e, ²¹^mnganjo ham sahi va pin-ambe va vaalu sen nivasaa-to ond ham naapuvu, ²²ⁿde ham oo anjakin ham nivasa lôôt in va nipaya vaha vaha pin.

²³^oTonde Anutu sen nawiing-ambe yiy nando melaas-ato, ond biing-ambe ham naatu omaahonôn nivalok keenaanôn, tonde ganggin ham kanum osin ham alompayo de ham anim naavi nivasa, in ham mando nivasa, de vakasin me-nanjip vu ham hôk busin sen yate Omaaho Bop Yesu Kalisi dukanom-ato le. ²⁴^pIn Anutu sen teey ham-ato me-le gavuuham e, ond yoo le ganggin ham naambêênja.

²⁵^qHalingg-aso, ham akam bu hey hôk lohakin,

²⁶^rtonde ham anôh Omaaho Bop-ate hil namand jak sa haalengg.

²⁷Sa naanêl vu ham jak Omaaho Bop haale naambe ham naasevin kaapiyaa-jo vu Omaaho Bop-ate hil pin vuu-ja be sil gango.

²⁸Yik vakasin lung laa-ja. Yate Omaaho Bop Yesu Kalisi-te samu samu naas mando gaving ham.

^k 5:19 Ep 4:30 ^l 5:20 1Ko 14:1,39 ^m 5:21 1; Jon 4:1 ⁿ 5:22 Iyop 1:1,8; 2:3

^o 5:23 Lom 15:33; 2Tes 3:16 ^p 5:24 1Ko 1:9; 2Tes 3:3 ^q 5:25 Kol 4:3; 2Tes 3:1

^r 5:26 Lom 16:16